

28.12.2015.

Vladin sektor želi kvalitetno učešće civilnog društva u kreiranju javnih politika



Vlada Bosansko-podrinjskog kantona Goražde i predstavnici nevladinog sektora potpisali su danas Sporazum o saradnji koji pored definisanja njihovih budućih odnosa ima za cilj promociju javnog općeg interesa, odnosno snažniji razvoj lokalnih resursa kroz dijalog i zajednički rad, a sve s ciljem poboljšanja ukupnog kvaliteta življenja stanovnika na području našeg kantona.

Cilj ovog sporazuma istovremeno je i stvaranje pretpostavki za razvoj zakonodavnog okvira i podzakonskih akata koji regulišu i sam način finansiranja. Prema riječima premijera BPK Goražde Emira Okovića, potreba za potpisivanjem ovog sporazuma postojala je iz razloga što je analiza pokazala da postoji značajan broj osnovanih udruženja u odnosu na broj koja aktivno djeluju.



„Potrebno je odrediti koja su to udruženja od interesa za Kanton da bismo što više razvijali aktivizam civilnog društva, jer znamo da je u nekim savremenim političkim sistemima ta uloga ogromna. Moramo težiti da taj dio, što je moguće više, u ovom Kantonu i državi razvijemo. S druge strane, imamo različite pristupe pojedinih udruženja. Neki smatraju da su nedovoljno praćeni u materijalnom smislu i svakom drugom obliku, možda nekad zamjeraju nekim drugim udruženjima da su bolje pozicionirani. U svakom slučaju, želimo to sagledati na što opširniji i kvalitetniji način.

Vladin sektor želi kvalitetno učešće civilnog društva ne u smislu samog finansiranja, već i potpunog doprinosa u kreiranju javnih politika. Želimo da to ne bude samo u okviru politike i političara, nevladin sektor je dio građana i mislim da mogu dati kvalitetan doprinos. To će biti aktivnost kojom ćemo se najvjerovatnije intenzivnije baviti u toku 2016.godine“ -kazao je premijer BPK Goražde Emir Oković.



Izvor: www.bpkgov.ba